

王萌待西域惡都奴界上逢受

師古曰逢受謂先至單待之逢見即受取也

于遣使送因請其罪

師古曰請免其罪也

使者以聞莽不聽詔下

會西域諸國王陳軍斬姑句唐兜以示之至莽篡位建

國二年以廣新公甄豐為右伯當出西域車師後王須

置離聞之與其右將股鞮左將尸泥支謀曰

師古曰鞮音丁奚反

聞甄公為西域太伯當出故事給使者牛羊穀芻茭導

譯前五威將過所給使尙未能備今太伯復出國益貧

恐不能稱

師古曰副所求也

不欲亡入匈奴戊巳校尉刁護聞之

師古曰刁音彫

召置離驗問辭服乃械致都護但欽在所埒婁

城

師古曰埒音劣婁音樓

置離人民知其不還皆哭而送之